

Eritreak Etiopia iparraldean bonbardatu du, eta bi armadak borrokan ari dira Itsaso Gorrian

■ *Etiopiak nazioarteko trafikoa blokeatu nahi duela salatu du Eritreak*

Agentziak / Addis Abeba

ERITREAKO Aire Armadako hegazkinek Adrigat herria, Etiopia iparraldean, bonbardatu zuten atzo, eta hainbat hildako eragin zituzten. Hala jakinarazi zuen Salome Tadesse Etiopiako Gobernuako bozeramaileak. Tadessek esan zuen herri horretan errefuxiatu ugari babesten direla, iparraldera 20 kilometrora dagoen Zalanbessa hiritik alde egin ondoren.

Eritrea eta Etiopiako soldaduak borrokan ari ziren atzo Asab inguruan, Eritreak Itsaso Gorriaren ondoan duen herrian. Asab 80 kilometrora dago Etiopiak, Eritreak eta Yibutik osatzen duten hirukiaren puntatik. Gainera, herri hori da Itsaso Gorritik Aden Golkorako irteera.

Eritreako Gobernuak, bestalde, Nazio Batuetako Segurtasun Kontseiluan salatu zuen Etiopiak Eritreako aire eta itsas eremuan itsasontzi eta hegazkin guztiei erasotzeko mehatxua egin duela. «Etiopiak aire eta itsasoko trafikoa guztia eten nahi du, eta, gainera, nazioarteko trafikoa askatasunari eta segurtasunari mehatxatu dio», esan zuen Haile Menkeriose, Eritreak Nazio Batuetan duen enbaxadoreak. X

Milaka atzerritar ihes egiten ari dira Ginea Bissautik

Agentziak / Bissau

BISSAU hiriburuko portuan eta aireportuan 3.000 inguru atzerritar zegoen atzo handik ihes egiteko garraio bide baten zain. Atzerritarren ebakuazioa pixka bat atzeratu zen, baina arratsaldean ekin zitzaion operazioari. Portugalak eta Frantziak itsasuntziak bidali dituzte atzerritarren ebakutzeko. Izan ere, borrokan jarraitzen dute Gobernuaren aldeko soldaduak eta Ansumane Mane jeneral matxinoaren aginduetara dauden tropek.

Senegalek soldaduak igorri zituen Ginea Bissauko Gobernuari laguntzeko errebolta-riak menderatzen. «Baiezta egin dugu Senegalgo tropak daudela Ginea Bissau. Munduak ulertu egin behar du gure herriak ezin dituela begiak itxi han gertatzen ari denaren aurrean», esan zuen Serigne Diop Senegalgo Komunikazio ministroak. X

San Juan de la Libertadeko operazioan parte hartu zuten polizia eta batzuk. TOMAS VAZQUEZ AP

Gatazka asko ari da larritzen Chiapasen

Astelehenetik 9 lagun hil dira San Juan de la Libertaden ekintza armatuen ondorioz

Gero eta itxura gaiztoagoa ari da hartzen Mexikoko Chiapas eskualdeko gatazka. Gobernuak PRIko militanteei eta segurtasun indarretako kideei erasotzea leporatzen die zapatistek. Zapatisten jarraitzaileek, berriz, han eta hemen enfrentamenduak sortzen ari direnak segurtasun indarrak eta paramilitarrak direla salatu dute.

Agentziak / San Cristobal

MOMENTU gogorrak ari dira bizitzen Chiapasen, gatazka gero eta bortitzagoa bilakatzen ari baita eta bakea gero eta urrunago ikusten baitute.

San Juan de la Libertad zapatisten udalerri autonomoa da, ez bairik gabe, arazo gogorrenak izan dituena —lehenago El Bosque zeritzon herri horri—. Astelehenaz geroztik bederatzi lagun hil dira enfrentamenduen ondorioz udalerri horretan: sei zapatisten jarraitzaileak, bi Gobernuko PRI alderdiko kideak (Alderdi Instituzional Iraultzaileak) eta polizia bat. Halaber, hamabi lagun zauritu dira.

Chiapasko Gobernuak emandako datuen arabera, enfrentamenduetatik aurrenekoa astelehenen jazo zen, Askapen Nazionalen Armada Zapatistaren (EZLN) hamabost bat jarraitzailek PRIko kideen kontra sarekada bat prestatu zutenean, betiere Gobernuak emandako informazioaren arabera. Sarekada horren ondorioz, PRIko bi militante hil ziren eta beste lau zauritu. Chiapasko Gobernuak PRIko militante soiltzat jo ditu hildako eta zauritu horiek, baina kontuan izatekoa da talde paramilitarretako kideak PRIkoak izaten direla kasu ugari.

Eraso hori dela eta Gobernuak segurtasun indarretako kide ugari

bidali zituen inguru hartara eta operazio zabala hasi zuten komunitate zapatisten kontra. San Juan de la Libertad ia erabat hartu zuten.

Gobernuaren arabera, asteazkenean segurtasun indarrek bi eraso jasan zituzten: bat Chabajebal komunitatean, eta, bestea, Nuevo Progreson. Bi eraso horien ondorioz, polizia bat hil zen eta beste sei zauritu. Chabajebalen segurtasun indarrek erantzun egin zieten erasotzaileei, eta sei pertsona hil zituzten, zapatisten jarraitzaileak. Aipatu iturrien arabera, hildako sei pertsonetatik bostek zapatisten moduko jantziak zituzten.

Nolanahi dela, San Juan de la Libertad udalerri autonomoko agintariak —Polizia eta soldaduen operazioaren ondorioz, 24 pertsona atxilotuta zeuden atzo, haien artean Dionisio Perez Perez alkatea—, oso bestelako informazioa eman dute azken egunotako gertakariei buruz. Herenegun

plazaratu zuten komunikatu batean esaten dute astearte gauean ehundaka polizia, soldadu eta «elementu paramilitar» sartu zirela beren herrira. Union Progreso komunitatean etxebizitzak eta bizilagunen ondasunak txikitu zituztela salatu zuen San Juan de la Libertadeko udal kontseiluak. Chabajebalen, berriz, segurtasun indarrak tiroka sartu zirela jakinarazi zuten eta hainbat bizilagun hil zituztela. Halaber, herritar guztiek polizien jazarpena pairatu behar izan zutela azperratu zuten San Juan de la Libertadeko agintariak, eta «terrorea» zabaldu zutela.

Egoera asko larritzen ari dela eta, Baketze eta Adiskidetzeko Batzordeak (COCOPA) —legebiltzarkideek osatzen dute erakunde hori—, «deialdi desesperatua» egin zien Mexikoko Gobernuari zein Armada Zapatistari elkarriketari berehala hel diezaioten. Jaina denez, Samuel Ruiz gotzainak utzi egin du bitartekaritza. X

Videla Argentinako diktadore ohiak epailearen aurrean deklaratu du desagertutako seme-alaben auziagatik

■ *Armadaburuak esan du indar armatuek errespetatu eta bete egin behar dituztela Justiziaren erabakiak*

Agentziak / Buenos Aires

JORGE RAFAEL VIDELA Argentinako diktadura sasoiaren (1976tik 1983ra) lehendakari izan zenak atzo deklaratu zuen Roberto Marquicek epailearen aurrean. Marquicek joan den asteartean agindu zuen Videla atxilotzeko, diktaduran desagertutako milaka seme-alaben bahiketaren arduradun nagusia izateagatik.

Oso litekeena da diktadore ohiaren deklarazioak agerian uztea militarren plana; hau da, diktadura bortitzaren biktimen

milaka seme-alaba jaso zituztela militarrek beren familietan. Errepresioaren ondorioz 20tik 23ra urteko 9.000 gazte daude desagertuta. Militarrek gurasoengandik banandu zituzten jaio bezain pronto, eta gehienetan ama hil egin zuten ondoren. Indar Armatuek antolatutako legez kanpoko egoitzetan jaio ziren haurrak. Horietako batzuk jatorrizko senideen esku utzi zituzten, baina beste asko militarrekin hazi ziren.

Marquicek epailea aztertzen ari da bahitutako haurren 30 auzi baino gehiago. Hala ere,

Videlak bakarrik erantzun beharko du Armadak antolatutako kontzentrazio eremuetan jaio-tako bost haurrengatik.

Argentinako Armadak Justiziaren erabaki guztiak bete behar dituela adierazi zuen atzo Martin Balzak, Armadako buruzagiak. Balza Mendoza hirira joan zen eta han hitz egin zuen Videlaren atxilotetaz lehenengo aldiz jendaurrean. «Armadak mugatu egin behar du Justiziak esaten duena onartzera eta betetzera, eta hori da egiten duguna eta Armadak egiten jarraituko duena», azpimarratu zuen Balzak.

Armadako buruzagia atseka-betuta azaldu zen desagertutako seme-alaben auziagatik. «Hobe litzateke nik erantzun ahalko banu eta seme-alaba galdu duen ama, senarra galdu duen emaztea edo maite bat galdu duen edozein poztu. Baina tamalez ez dago informaziorik Armadan».

Maiatzeko Plazako Amonak erakundeko lehendakari Estela de Carlotok, berriz, ez du uste Carlos Menem Argentinako lehendakariak Videla indultua emango dionik «herriaren presioari desafioa eginez». X